



全唐詩目 第七函

第十冊

李逢吉

于頔

盧景亮

李渤

孟簡

王仲舒

孫革

汪萬於

何儒亮

李宗閔

韋表微

六卷

徐凝

一卷

李德裕

一卷

熊孺登

一卷

李涉

一卷

陸暢

一卷

柳公權

吳武陵

韋處厚

楊敬之

全唐詩

李逢吉

李逢吉字虛舟隴西人登進士第元和長慶兩朝嘗再  
爲宰相太和中以司徒致仕卒諡曰成其詩與令狐楚  
同編者名斷金集今存八首

享惠昭太子廟樂章

旣潔酒醴聿陳腍腥肅將震念昭格儲靈展矣禮典薰  
然德馨悃悃管磬亦具是聽

望京樓

一作臺

上寄令狐華州

祇役滯南服頽思屬暮年閑上望京臺萬山蔽其前落  
日歸飛翼運翮東北天涪江適在下爲我久潺湲中葉

成文教德威清遠邊頌條信徒爾華髮生蒼然寄懷三  
峰守岐路隔雲烟

再赴襄陽辱宣武相公貽詩今用奉酬

解鞍辭丹禁揚旌去赤墀自驚非素望何力及清時又  
據三公席多慙四老祠峴山風已遠棠樹事難追江漢  
饒春色荆蠻足夢思唯憐吐鳳句相示鑿龍期

奉送李相公重鎮襄陽

海內埏埴徧漢陰旌旆還望留丹闕下恩在紫霄間冰  
雪背秦嶺風煙經武關樹皆人尙愛轅郎吏曾攀白惜  
兩心合相看雙鬢斑終期謝戎務同隱鑿龍山

和嚴揆省中宿齋遇令狐員外當直之作

致齋分直宿南宮越石盧諶此夜同位極班行猶念舊  
名題章奏亦從公曾驅爪士三邊靜新贈髯參六義窮  
竟夕文昌知有月可憐如在庾樓中

奉酬忠武李相公見寄

直繼先朝衛與英能移孝友作忠貞劒門失險曾縛一作  
虎淮水安流緣斬鯨黃閣碧幢惟是儉三公二伯未爲  
榮惠連忽贈池塘句又遣羸師破膽驚

酬致政楊祭酒見寄

初還相印罷戎旃獲守皇居在紫煙妄比鄼侯功蔑爾  
每懷疏傅意一作悠然應將半俸霑閭里料入中條訪洞  
天十載別離那可道倍令驚喜見來篇

送令狐秀才赴舉

子有雄文藻思繁  
韶年射策向金門  
前隨鸞鶴登霄漢  
却望風沙走塞垣  
獨憶忘機陪出處  
自憐何力繼飛翻  
那堪兩地生離緒  
蓬戶長扃行旅喧

于頔

于頔字允元河南人以蔭補千牛擢累駕部郎中湖蘇  
二州刺史襄州節度觀察使元和初拜司空尋貶恩王  
傅終太子賓客詩二首

郡齋臥疾贈晝上人

夙陪翰墨徒深論窮文格麗則風騷後公然我詞客晚  
依方外友極理探精蹟習台南北宗晝公我禪伯尤明

性不染故我行貞白隨順令得解故我言芳澤雪水漾  
清潯吳山橫碧岑含珠復蘊玉價重雙南金的皦曜奇  
彩淒清流雅音商聲發楚調調切譜瑤琴吳山爲我高  
雪水爲我深萬景徒有象孤雲本無心衆木豈無聲椅  
桐有清響衆耳豈不聆鍾期有眞賞高潔古人操素懷  
夙所仰覲君冰雪姿祛我淫滯想常吟柳惲詩茗蒲久  
相思逮此遠爲郡蘋洲芳草衰逢師年臘長值我病容  
羸共話無生理聊用契心期

和丘員外題湛長吏舊居

蕭條歷山水木無氛滓王門結長裾巖扃怡暮齒昔  
賢枕高躅今彥仰知止依依矚煙霞眷眷返墟里湛生

久已沒丘也亦同恥立言咸不朽何必在青史

盧景亮

盧景亮字長晦范陽人少孤力學善屬文德宗時歷右  
補闕鯁毅無所回貶斥二十年至元和初召還再遷中  
書舍人詩一首

寒夜聞霜鐘

洪鐘發長夜清響出層岑暗入繁霜切遙傳古寺深何  
城亂遠漏幾處雜疎砧已警離人夢仍霑旅客襟待時  
當命侶抱器本無心儻若無知者誰能設此音

李渤

李渤字濬之洛陽人少隱嵩山元和中徵爲著作郎敬

宗時由考功郎中拜給事中伉直敢言出爲桂管觀察  
使詩五首

南溪詩

并序

桂水灘山右匯陽江數里餘得南溪口溪左屏外  
崖巘鬬麗爭高其孕翠曳煙邐迤如畫左連幽野  
園田雞犬疑非人間沂流數百步至巖巖下有灣  
壤沮洳因導爲新泉山有二洞九室西南曰白龍  
洞橫透巽維蛻骨如玉西北曰玄巖洞曲通坎隅  
晴眺灘水玄巖之上曰丹室白龍之右曰夕室巽  
維北梯險至仙窟北又有石室參差呀豁延景宿  
雲其洞室並乳溜凝化詭勢奇狀俯而察之如傘

如輦如欒櫨支撐如蓮蔓藻井左睨左瞰似簾似  
幃似松偃竹裹似海蕩雲驚其玉池井嵐飈迴還  
交錯迷不可紀從夕室梁溪向郭四里而近去松  
衢二百步而遙余獲之若獲荆璆與虵珠焉亦疑  
夫大舜遊此而忘歸矣遂命發潛徹深磴危宅旣  
翼之以亭榭又韻之以松竹似讌方丈似昇瑤臺  
麗如也暢如也以溪在郡之南因目爲南溪兼賦  
詩以紀之寶曆三年三月七日

玄巖麗南溪新泉發幽色巖泉孕靈秀煙雲紛崖巒斜  
峰信天插奇洞因神闢窈窕去未窮環迴勢難極玉池  
似無水玄井昏不測仙戶掩復開乳膏凝更滴丹砂有

遺址石徑無留跡南眺蒼梧雲北望洞庭客蕭條風煙  
外爽朗形神寂若值浮丘翁從此謝塵役

喜弟淑再至爲長歌

第六字  
缺四字

前年別時秋九月白露吹霜金吹烈離鴻一別影初分  
淚袖雙揮心哽咽別來幾度得音書南岳知

廬山峨峨倚天碧捧排空崖千萬尺社牂長題高士名  
食堂每記雲山跡我本開雲此山住偶爲名利相縈誤  
自負心機四十年羞聞社客山中篇憂時魂夢憶歸路  
覺來疑在林中眠昨日亭前烏鵲喜果得今朝爾來此  
吾吟行路五十篇盡說江南數千里自憐兄弟今五人  
共縈儒素家尙貧雖然廩餼各不一就中總免拘常倫

長兄年少曾落托拔劍沙場隨衛霍口裏雖譚周孔文  
懷中不舍孫吳略次兄一生能苦節夏聚流螢冬映雪  
非論疾惡志如霜更覺臨泉心似鐵第三之兄更奇異  
昂昂獨負青雲志下看金玉不如泥盲道王侯身可貴  
却愁清逸不干時高蹤大器無人知倘逢感激許然諾  
必能萬古留清規念爾年來方二十夙夜孜孜能獨立  
卷中筆落星漢搖洞裏丹靈鬼神泣嗟余流浪心最狂  
十年學劍逢時康心中不解事拘束世間談笑多相妨  
廣海青山殊未足逢著高樓還醉宿朝走安公櫪上駒  
暮倫陶令籬邊菊近來詩思殊無況苦被時流不相放  
雲騰浪走勢未衰鶴膝蜂腰豈能障送爾爲文殊不識

貴從一一傳胷臆若到湖南見紫霄會須待我同攀陟  
留別南溪二首

常歎春泉去不回我今此去更難來欲知別後留情處  
手種巖花次第開

如雲不厭蒼梧遠似鴈逢春又北歸惟有隱山溪上月  
年年相望兩依依

桂林歎鴈

三朝四點倦遐征往復皆愁萬里程爾解分飛却回去  
我方從此向南行

孟簡

孟簡字幾道德州人舉進士宏詞皆及第元和中累官

御定至唐詩 十冊  
至戶部侍郎坐事貶吉州司馬詩七首

享惠昭太子廟樂章

喧喧金石容既缺肅肅羽駕就行列  
綏山遺響昔所聞廟庭進旅今攸設

擬古

劍容不誇貌主人知此心但營纖毫義  
有計千萬金勇發看鷺擊憤來聽虎吟  
平生貴酬德刃敵無幽深

詠歐陽行周事

并序

閩越之英惟歐陽生以能文擢第爰始一命食太  
學之祿助成功之教有庸績也我唐貞元年己卯  
歲曾獻書相府論大事風韻清雅詞旨切直會東

方軍興府縣未暇慰薦久之倦游太原還來帝京  
卒官靈臺悲夫生於單貧以徇名故心專勤儉不  
識聲色及茲筮仕未知洞房纖腰之爲蠱惑初抵  
太原居大將軍宴席上有妓北方之尤者屢日於  
生生感悅之留賞累月以爲燕婉之樂盡在是矣  
旣而南轅妓請同行生曰十日所視不可不畏辭  
焉請侍至都而來迎許之乃去生竟以蹇連不克  
如約過期命甲遣乘密往迎妓妓因積望成疾不  
可爲也先死之夕剪其雲髻謂侍兒曰所歡應訪  
我當以髻爲貺甲至得之以乘空歸授髻於生生  
爲之慟怨涉旬而生亦歿則韓退之作何蕃書所

謂歐陽詹生者也河南穆玄道訪予常歎息其事  
嗚呼鍾愛於男女素期效死夫亦不蔽也大凡以  
斷割不爲麗色所汨豈若是平古樂府詩有華山  
畿玉臺新詠有廬江小吏相死或類於此暇日偶  
作詩以繼之云

有客西北逐驅馬次太原太原有佳人袖豔照行雲座  
上轉橫波流光任夫君夫君意蕩漾即日相交歡定情  
非一詞結念誓青山生死不變易中誠無間言此爲太  
學徒彼屬北府官中夜欲相從嚴城限軍門白日欲同  
居君畏仁人間忽如隴頭水坐作東西分驚離腸千結  
滴淚眼雙昏本達京師迴賀期相追攀宿約始乖阻彼

憂已纏綿高髻若黃鸝危鬢如玉蟬纖手自整理剪刀  
斷其根柔情託侍兒爲我遺所歡所歡使者來侍兒因  
復前投淚取遺寄深誠祈爲傳封來贈君子願言慰窮  
泉使者迴復命遲遲蓄悲酸詹生喜言旋倒屣走迎門  
長跪聽未畢驚傷涕漣漣不飲亦不食哀心百千端襟  
情一夕空精爽且日殘哀哉浩然氣潰散歸化元短生  
雖別離長夜無阻難雙魂終會合兩劍遂蜿蜒丈夫早  
通脫巧笑安能干防身本苦節一去何由還後生莫沈  
迷沈迷喪其眞

惜分陰

業廣因功苦拳拳志士心九流難酌挹四海易消沈對